

✧ معارف نظارت جلیله سی طرفدن ✧  
رخصتنامه یه درج بیوریلان جمله تقدیریه دره.

بوکتاب ، شایان استفاده بر اثر معتبر و بهتر در .



## — بر اثر مهم دیانتپرورانه —

بوعنوان ایله حکیم شهیر عطوفتلو احمد مدحت افندی حضرتلری طرفندن اشبو اثر ناچیزانه من حقنده (ترجمان حقیقت) ک ۲۴ مارت ۳۱۳ تاریخی نسخه سنه درج ایملن فقره التفاتپرورانه در :


فیوضات مقدسه دین اسلامک اون اوچ عصر دن بری نه صورتله تنویر اقطار جهان ایلمش اولدیغنه دائر شمعی به قدر حقایق تاریخی بی حاوی بعض آثار متفرقه نشر ایلمش ایسه ده دین مقدسک قواعد علویه سیله عالمده افکار مدنیه وانسانیه بی نشر و اعلان خصوصنده کوستردیکی تأثیرات فیاضانه بی ازمنه سابقه تاریخیه اراسنده بر فکر حقیقت ایله تدقیق و تحقیق ایدرک اولبایده دلائل منوره جمع ایتمک و بودلائلک مجموعندن ده غایت مهم و عالی بر اثر دینی وجوده کتیرمک خصوصی ارباب قلم و همت طرفندن هنوز درعهده ایلمامش ایدی .

معالی آثار دیانت و معرفت ظهورینه مهد فیض آورا اولان عصر کزین حضرت خلافتناهیده دینی و علمی اک بیوک آثار جیده میدانه کتیرلمش ایکن دین جلیل اسلامه متعلق بویله بر اثر علوینک قوه تحریرده قالبی معارف نظارت جلیله سنه شرفبخش اولدقلری تاریخدن بری هپ مدار قوام اسلام اوله جق آثار نشرینی ترویج ایله جدأ مشکور الهمه اولان

معارف عمومیہ ناظرِ معالی مظاہری دولتو زہدی پاشا حضر۔  
 تہ نچہ تجویز بیورلیہرق دین جلیل اسلامک قطعات عالمہ  
 صاحبذنی انوار مدنیتی نظرلرده تجلی انداز ایدہجک حقایق  
 جلیہ تاریخیدن مرتب بر اثر مهم و مدققانہ وجودہ کتیرلمسنی  
 بالالتزام بوامر عالعالی آثار محققانہسی زیور ایادی اعتبار  
 اولان فخرالافاضل نحریر فاضل فضیلتو محمود اسعد اقدی  
 حضر تہرینک قلم مشکین رقم نحریرانہلرینہ حوالہ بیورمش  
 اولدقہری واصل سمع استخبار و منونیت اولمشدر .  
 اک بیوک، اک زیادہ شایان تجیل آثار دیانت کسترانہدن  
 اولان بویہ بر اثر عہد معالیوفد حضرت خلافتناہی یہ شرف  
 آور اولہجق بر موفقیت قلمیہ و علمیہ تشکیل ایدہجکندن  
 ناظر مشار الیہ حضر تہرینک زمان نظارتلرندہ ہپ بوکبی مائر  
 مہجہ و مقدسہ وجودہ کلسنہ حصر فکر دیانتپرورانہ بیورملری  
 الحق کہ تعالیٰ دین جلیل اسلام حقندہکی آمال مقدسیت اشمال  
 حضرت ظل الہی مقتضیات جلیہسنہ لایقیہ توفیق معاملہدن  
 عبارت بر حرکت مدوحہ اولمغہ تمام موفقیت دولتہری تمنیاتی  
 تکرار ایلہ کسب فخر ایلرز .



## دیباجه



بعد ادای ماوجب علینا .

تاریخ ، اویله بر علم جلیل القدر در، که آکا بر حد و انتها  
تصوری ممکن دکدر .

تاریخ، اودرجه واسع بر علمدر، که هیئت مجموعہ سنہ نسبتہ  
تاریخ بشر، انجق بر بانی اشغال ایدر .

فی الحقیقه بشریتک نصل طوغوب بیودیکنی، نه صفحہ لر  
کچر دیکنی، آنا فآنا شودرجه کاله ته صورتہ واصل اولدیغنی  
بزه کوسترن، تاریخدر .

آنجق مخلوتک فرد اتم واکلی اولان انسانک ریوزنده  
ظهورندن اول دخی تاریخ موجود ایدی . طاغری تشکیل  
ایدن هر ذره، دکز قوملرندہ مخلوط اولان هر قوقعه، تاریخ  
عالمک برر صحیفه سیدر .

والحاصل؛ تاریخ، مرآت کائناتدر . سلسله اعصار متعاقبه ده  
هر نه ظهور ایش ایسه، او مرآتده منجلی اولمشدر . آکا  
عطف نظر ایدن لر، احوال سالفه ووقایع ماضیه یه تماماً مطلع  
اولور لر؛ لکن زاویه انعکاسندن باقه بیلیمک شرطیه .

تاریخ، بشریتک ده آینه سیدر . انسانلرک احوال عمومیہ

و خصوصيه لری، هپ اوراده انطباع ایتشدر . انسان، نفسی، او آینه ده طایر؛ اطوار مقبوله و مقدوحه سنی اوراده مشاهده ایدر .

تاریخ، معارف بشریه نك بالجمله شعبات و اقسامنی ده جامعدر . تاریخه تماماً مطلع اولدیغنی ادعا ایده بیلن کیمسه - اکر و ارایسه - علوم اولین و آخرنی جمع ایتش دیمکدر .

تاریخ، بر بحر محیطدر . علوم و فنون، معارف و صنایع، ادبیات هپ او بجره منصب اولان برر نهره بکزر . اشبو بحر محیطده شناورلك ایده بیلندر؛ آنک بدایع لآلیسنه دسترس اولورلر .

دین و مذهب، حکمیات و الهیات<sup>۱</sup> دخی، احوال بشری اصلاح ایدن اسبابك اک برنجیلری اولمق<sup>۲</sup> حسیله، تاریخك حوزه اطلاعنه داخل اولمشلردر .

انکچون هر قومك، هر مملکتك، هر عالمك، هر صنعتك برر تاریخنی اولدیغنی کبی؛ ادیان و مذاهدن هر برینك ده برر تاریخ خصوصیی واردر؛ اودینك نصل ظهور و انتشار ایتدیکنه، اومذهبك نصل تأسس ایلدیکنه دائر<sup>۳</sup> اعطای معلومات ایدر .

دین اسلام، که اون اوچ عصردن بری عالمك بر قسم مهی اوزرنده نیرافشان اعتلا و اشتهار اولمش و انسانلرک قسم اعظمی داخل دائر<sup>۴</sup> مدنیت ایتشدر، آنک بر تاریخ خصوصیی اولماق قابلمیدر ؟

بالعكس، الكچوك تفرغانه قدر تاريخى تامما معلوم ومضبوط اولان دين، يالكز اسلاميتدر . صاحب شريعت صلى الله عليه وسلم افندمز حضرتلربنك هانكى مملكتده وهانكى كون دار دنيانى تشرىف بيوردقلرىنى، سن صباوتلرىنى نرلرده كچير - دكلرىنى، نه وقت انسانلرى طريق حقه دعوته مأمورا اولدقلرىنى، بووظيفه مقدسهلرىنى نه صورتاه اينفا ونه وقت ارتحال داربقا بيوردقلرىنى، رحلت نبويه دن صكره اصحاب كرام وتابعين ذوى الاحترام حضراتى زمانلرنده قواعد اسلاميه نك نه صورتاه توسع وانتشار ايلديكىنى، تاريخ بزه مفرداتيه كو سترىيور .

الكچوك بر مسئله ايچون بر كتاب تدوين اينده جك قدر همتر صرف ايند علمای اسلاميه نك، تاريخ دين اسلام كې مهم ومعتابه بر علمى نظر اهميتدن اسقاط ايمش اولنه لرى قابلميدر؛ بالعكس علوم شرعيه نك كافه شعباتى كې، بوبابده دخى حل ايمهدك جهت، يازمادق مسئله براقامشلدردر .

لكن، تاريخ دين اسلامك بر علم مخصوص ومنفرد شكندده تدوين ايدليكنه تصادف اولنه مادي . بوكا عائد مسائل، درر متثره كې كتب مطوله ايچنده مسائل شرعيه سائر ايله برابر قارىشوب كيتمشدر.

آنكچون، شمدي تاريخ دين اسلامه دائر معلومات مجمله آلمق ايسته ينلره، تركجه درلى طويل بر اثر ارأئه سندن عاجز قاليرز .

ایسته؛ بوقضیه: الاول افاحم و زرای دولت علیه دن، زمانزده  
 ارباب علوم و معارفك مقتدا بهی بولنان بر ذات دیانتسماتك  
 نظر دقت علامانه لرینه تصادف ایلمشدر : عثمانیلر ایچون نیجه  
 تجدداته مبدأ اولان یکریمی سنهك بر مدت ظرفده سایه  
 سعادت سرمایه حضرت عبدالحمید خانیده پك چوق نواقصمز  
 اکمال ایدلیکی وطریق علم و معرفده خیلی مسافه قطع اولندیغی  
 حالده؛ بویله مهم برجتهك نظراعتباردن دور طوتلمسنى، معارف  
 ناظر معالی مظاهری بولنان وزیر مشار الیه دولتو زهدی پاشا  
 حضرتلری تجویز بیورمدقلرندن؛ کتابخانه ملیمزه تاریخ دین  
 اسلام حقنده بر انمودج علاوهسنى محرز عاجزه امر و اشارت  
 بیوردیلر .

اشبو اثره درج اولنه جق مسائلك همان کافهسى، کتب  
 اسلامیه ده مسطور اولمسنه و بزم ایچون یایله جق شی یالکنز  
 اشبو مسائلی جمع و ابواب و فصوله تفریق ایدویر مکدن عبارت  
 بولمسنه نظراً، بونک بر امر سهل اولدیغی فرض ایدیله بیلورسه ده؛  
 اودریای بی پایان ایچنه کیردرک مطلوبه ملایم مسائلی تفریق  
 ایتک وبعده مباحثك انسجامنی محافظه ایددرک هر برینی یرلی  
 یرینه یرلشدیرمک؛ اویله پك ده قولای برشی اولمادیغی درکاردر .  
 میدانه همان یکیدن بر علم کتیر رجهنه دشوار اولان شو  
 امر مهم و معتنا بهك حیز حصوله ایصالی؛ اقتدار عاجزانه مک  
 فوقده بر اقتداره متوقف اولدیغی؛ وارسته کلفه بیاندر .


انجق، ايشك اهميتنى واثرك يكيلىكنى چشم انصافه آلان  
ذواتك تصادف بيوره جقلى نواقصى نظر مسامحه ايله كوره -  
جكلرينه امنيت، بودرجه مشكل بروظيفه ني درعهده ايتمكلكمه  
جسارت ويردى .

ذاتاشبو تشبث ناچيزانهم، بوبابده آتيلان ايلك خطوه در.  
بعدها علماء عظام حضراتى طرفلرندن تاريخ دين اسلامه دائر  
نجه آثار فواند نثار ميدانه كتير يله زك اشبو اثر ناچيزك كواكه ده  
براقيله جغه شبهه يوقدر .

محرر عاجز ايجون اك بيوك شرف . بويله بر امر ديانتيپر -  
ورانه يه امثال ايتك و ارباب قلمه ده بر نمونه كوسترمكن  
عبارتدر . اكر اصحاب فضل و عرفان طرفندن شو آچيلان  
طريقده دوام اينديلور ايسه ، مساعى كمرانه مك مشر اولديغى  
ثابت اوله جقدر .

توفيق ايسه جناب حقدندر .

محمود اسعد



## تاریخ دین اسلام


بِسْمِ اللَّهِ الرَّحْمَنِ الرَّحِيمِ



### مدخل

#### معلومات ابتدائیه

مندرجات : تاریخ دین اسلامک تعریف و تقسیمی — تاریخ دین اسلامک مأخذلری و درجه موثوقیتی — دین و ملتك معناسی — مملکت و سلاله — شهریلر و بدویلر — تجارت مرکزلری — پنایرلر — دین و مذهب — مکه مکرمه و بئر زمزم — رؤسای عرب — انبیای عرب ، حنیفلره موحدلر — زمان بعثتده افکار عرب — ادیان و مذاهب سائرده برنظر .



۱

#### تاریخ دین اسلامک تعریف و تقسیمی

۱. — تاریخ دین اسلام، شریعت غرای محمدیه نك جناب رسالتاب اقدمز حضرتیلری طرفدن کیفیت تبلیغندن وعصرأ بعد عصر صورت توسع وانتشارندن باحدر .

تاریخ دین اسلام، قواعد اسلامیہ نك کیفیت وضع و تاسیس نہ  
 دائر بر علم اولدینی جہتلہ: بوندہ حرور و مغازی و وقایع  
 سائر نك بیانہ کیریشلمیہ جک و موضوع مسئلہ نك ایجاب  
 ایتدیکی وقایعدن علی سبیل الاستطراد بحث اولنہ جقدر .

تاریخ دین اسلام، بر تاریخ خصوصی اونغلہ تاریخ عمومینك  
 تقسیم مثله اعتبار ایدلیہ رك کندینہ مخصوص بر تقسیم طبعی  
 اختیار ایدلش و بوندہ مسائلك تسهیل تفهیمی مقصدی  
 کوزہ دلشدر .

دین اسلامك ظهور و انتشاری هپ قرون وسطایہ عائد  
 اولوب بو اثرده آنخا ایدیلن اصولہ کورہ یدی دورہ منقسمدر:  
 دور اول، عصر رسول الله صلی الله علیه وسلمه عائد وایکی  
 قسمی حاویدر: قسم اول قرآن عظیم الشان، قسم ثانی سنت  
 حقنہ در. دور ثانی، قرن اصحابدر. دور ثالث، قرن تابعیندر.  
 دور رابع، امویلر دوریدر. دور خامس، عباسیلردن منصور  
 و هارون دوریدر. دور سادس، مأمون دوریدر. دور سابع،  
 فقہا دوریدر .

تاریخ دین اسلامك بحق اکلاشلمسی ظهور ایتدیکی زمان  
 و مکان حقنہ بعض معلومات اعطاسنہ وابسته اولدیغدن:  
 عربستانك احوال موقعیہ سنہ و بعثت نبویہ دن اول قوم عربك  
 عادات و معتقداتنه دائر بروجہ آتی بعض مباحث علاوہ سنہ  
 لزوم کورلمشدر .

## ﴿ ۲ ﴾

﴿ تاریخ دین اسلامک مأخذلری ودرجهٔ موثوقیتی ﴾

۲. — علماء اسلام حضرتانک تاریخ دین اسلام حقنده اجرا ایتدکلمری تقیدواهتمام، سزاوار حیرت و آنلرده کوزیلان جدیت وانتظام، واهرس ارباب فکرتدر. حقیقته ووصول وبعده آنی اخلافه نقل وایصال خصوصنده آنلر قدر جدی ودائمی برصورتده صرف مساعی ایدلمسی همان خازج ازداثرهٔ امکاندر. « انانحن نزلنا انذکر وانا له حافظون » آیت کریمه سنده قرآن عظیم الشانک و دین مبین محمدینک ظرف سبحانیدن انزال اولندیغی وتغیر وزوالدن حفظی دخی ذات اقدسہ عائدا اولدیغی بیان بیورمشدر. فی الحقیقه شریعت مصطفویه . الک کوچوک تفرعانه قدر زمان سعداقتران نبویدن بری. هر درلوتحریفاتدن محفوظ قالمشدر. کراک قرآن عظیم الشانک وکراک سنن نبویه نیک نقل وروایتنده اصحاب وتابعین حضرتانک همت وغیرتلمری فرق مایتصورددر. اشبو روايات، شریعت اسلامیه نیک ایلک ظهور ایتدیکی زمان ومکان حقنده مطنوب اولان وثوق و اعتمادی حائردر. بر حکومت منتظمه یه، بر ادارهٔ مرتبه یه مملک اولیان بر قومک احوال ووقایعک بودرجه شهرت وتواتر ایله معلوم اولمسی، جناب حقک بوامت ناجیه یه بخش واحسان بیوردیغی خصائص عالیهدن ومحیر العقول اولان خارقه لر دندر. خزینهٔ اوراق و دفترخانه کبی تأسیسات منتظمه دن محروم

اولان بوقوم نجیبك هر درلو احوالی، زمان وقعهده حاضر و شاهد بولسان ذواتك شهادتله به ضبط ایدلش و مرور ایام ایله شهادات واقعه، رسمیت حالتی کسب ایدهرك صدورن سطوره نقل اولمشدر .

مدینتك اکتساب ایتدیکی حال حاضرده بوکچی احوال و وقوعات حقنده اجرا ایدیلن تدقیقات، احتمال که دها زیاده انتظام اوزره جریان ایتش اولسون؛ لکن اودرجه خلوص و صفوت ایله اجرا ایدیه میه جکی، وارسته قید اشتباهدر . اسلاف عظام حضراتنک نائل اولدقلری خلوص نیت، و صدق و رویتک زمانمز مورخلرنده بولنسی احتمالی متصورمیدر؟

اسلاف عظام حضراتنک حقیقتی نقل و روایت خصوصنده التزام ایتدکلی صداقت و استقامت، اجانب نظرنده بیله نظر تقدیر و اعتماد ایله مشاهده ایزلمکدهدر . علمای اسلام حضرا- تنک دین اسلامه اولان شدت محبت و ارتباطلری - ادیان سائره اربابی کبی - اعلائی دین مقصدیه تغیر حقیقت ایتله رینه باعث اولیوب؛ امر دینده دکل، حتی امور عادیدهده بیله اختیار کذب ایدنلر، الی آخر العمر مذموم و مقدوح اولمشلر، واسملری صحائف توارینجه کچهرک، نقل و روایتلری اعتباردن اسقاط ایدلمشدر .

والحاصل صدر اسلامده ظهور یافته اولان حادثات و وقایع اودرجه مؤثوقیت ایله معلومدر، که ادیان و مذاهب سائره بیننده

نیجه جهتلردن طولانی حائر رحمان اولان دین اسلام، بوبابده  
 دخی تمیز و تفرد ایلمشدر . یالکیز ادیان و مذاهب دکل،  
 تاریخده اسمی مذکور اولان اقوام ایچنده بیله اصلی بروجه  
 صحت معلوم اولمق شرفی، اسلامیه مخصوص اولوب بوامتیا زینی  
 الی آخر الدوران محافظه ایده جکدر . هانکی بر قومک تاریخنی  
 قارشیدیرسه کز ازمنه عتیقه یه ارجاع نظر ایتدکجه ، افساندر  
 آراسنه قاریشوب کیتدیکنی کوررسکیز . یونانیلر و رومالیلر  
 کبی کندیلرینی اقوام متمدنه نك سرفرازی عد ایدن اقوامک  
 اصلنه مراجعت ایدیکیز؛ قهرمانلره، نیم اهلره، الاده و الاهلره،  
 منجر اولدیغنی کورر واساطیر و خرفات آراسنده نور حقیقتی  
 ضایع ایدرسکیز .

عالمده هیچ بر قوم یوقدر، که حفظ ووقایه ایتک ایستدیکی  
 وقایع قدیمه سنی اسلامیت قدر محافظه ایده بیلمش اولسون .  
 ادیان سائرده دن زمانزه اک قریبی اولان نصرانیتمک مبادیسی  
 حقنده اصلا معلومات موثوقه اولمادیغنی شویله طیرسون، زمان  
 تبوتدن ایکی عصر صکره کلن غرب ایمراطوزی شارلمان  
 دورینک احوال ووقایعی بیله . اسلامیت قدر معلوم دکلدر .

ادیان و مذاهب سائرده نك منشائی ظلمت مجهولیت ایله  
 مستوردر؛ بوبابده اجر ایدیلن تدقیقات عمیقه آنلرک اوزرندکی  
 حجابی رفع ایدمدیکی کبی، الی الابد رفع ایددمیه جکدر . اسلا-  
 میتده ایسه مستور هیچ برشی یوقدر . بیوک بر قومک کوزی

اوکنده ظهور وانتشار ایلمشدر . تاریخ دین اسلام، عالم اسلام- میتک همان هر طرفده یکدیگرندن غیر متفاوت اوله رق معلومدر . اسلامیتده عقله صیغماز، فکر قبول ایتمز برشی یوقدر . تاریخ دین اسلامه واقف اولیان اقوام، واریسه، بوقصور اسلامیتده اولیوب بلکه اکا واقف اولیانلردهدر .

عالمده برطاقم مذاهب وارددر، که حتی مؤسسلرینک اسمی بیله معلوم دکلدز . مثلاً یوزلرله میلیون انسانلرک مقتدا بهی اولان براهما مذهبی، تعاقب ملل واقوام وتوالی دهور واعوام ایله تشکل ایتمش برمذهبدر . بونک تشکلنه نیجه شاعرلر معاونت ایتمش، برسالالهنک دست معاونتیله میدانه کلشدر . بومذهبک نه وقت باشلادیغنه واصل توسع وانتشار ایتدیکنه دائر اصلا معلومات یوقدر . اسکی یونان مذهبنک اصلی دخی، بعینه براهما مذهبی کبی بالکلیه مجهول ومشوش برحالده قالمشدر .

۳۰ — اسلامیتک اصلی قرآن عظیم الشان ایله سنت نبویهدر . قرآن کریم بالشهره والتواتر ثابت اولمشدر . یعنی صاحب شریعت صلی الله علیه وسلم افندمز حضرتلرندن برجم غفیر استماع ایتمش؛ آنلردنده الی یومنا هذا هپ او یولده کذب اوزرینه اجتماعلرینی عقلک تجویز ایتمیه جکی جماعات کثیره نقل ایده کلشدر . سنن نبویهنک ایچنده دخی او یولده تواترأ ثابت اولانلر اولدیغی کبی آحاد طریقله منقول اولانلرده وارددر . هر ایکینسک کیفیت نقل وروایتی، بحث مخصوصنده کله جکدر .



﴿ دین و ملتک معناسی ﴾

۴. — دین، اطاعت و انقیاد معناسه در . بعضا جزا  
معناسه کلور، « کاتدین تدان » دینلور که « نصل جزا ایدر سهک  
اویاه جزا نورسین » دیمکدر . بعضا یوم قیامتده کوریلن  
حساب معناسه کلور .

نوع انسان: امر معاشنی استحصال ایتک و امر معاده  
حاضر لنمق ایچون یکدیگریله اجتماعه محتاجدر . اجتماع دخی،  
بیلرنده تمناع و تعاون حاصل اوله جق شکده او مالیدر، که تمناع  
و تدافع طریقیه مال و ملکترینی محافظه ایده بیلسونلر؛ تعاون  
و تناصر طریقیه ده مالک او نادقلمری شیلری ایده ایلسونلر .  
« الحاصل انسان مدنی الطبع اولدیغدن سائر حیوانات کبی  
منفرداً یشایه میوب بسط بساط مدنیت ایله یکدیگره معاونت  
و مشارکته محتاجدر . « ایسته انسانلرک بوهیئت اوزره اجتمـا-  
عدرینه « ملت » دینلور . بوهیئته ایصال ایدن طریق دخی منهاج،  
شریعت، سنت ناملریله یاد اولنور . بوسنت اوزرینه اتفاق  
ایتمه لرینه ده « جماعت » نامی ویریلور .

ملت کبری، ابراهیم علیه السلامک ملتیدر . بوکا « ملت  
حنیفه » دخی دینلور که مقابلی صابئی مذهیدر . قرآن  
کریمده « ملة ابراهیم » وارد اولمشدر .



مملکت و سلالہ

۵۔ عربستان قطعہ سی غرباً بحر احمر، شرقاً فرات نہری، بصرہ کور فزی، جنوباً بحر محیط ہندی و عمان دکیزی، شمالاً شام چوللری ایہ محاطدر۔ بوقطعہ ازمنہ تاریخیہ تک ابتدا سندن یدنجی قرن میلادی یہ دکن ہیچ برتبدلہ اوغراما۔ مشدر۔ آسیانک جنہات ساثرہ سنی زیر وزبر ایدن و اوروپا ایہ آفریقائی تا وسطنہ قدر تہدید ایہین وقایع آرسندہ عربستان ازہر جہت مصون قالمشدر۔ حکومتلر و مملکتلر ظہور ایدوب محو اولدینی، اسکی سلالہ لر اندراس بولدینی، مملکتلرک حدودی و اسامیسی تبدل ایتدیکی و اہالیسنک قتل عام و یاخود اسیر ایدلدیکی و قتلر، عربستانک - حدود بویندہ کی ولایاتی عمر نہ۔ قدر بعض تحولاتہ اوغرامش ایسہدہ - چوللرینک و سسندہ اقامت ایدن اہالیسی اخلاق اصلیلرینی و استقلاللرینی دائماً محافظہ ایتمش، بالا کزین اولان رقبہ لری اصلاً دوچار ذل اسارت اولمامشدر۔

برچوق قبائلہ آریلان و افتراقی نسبتندہ ظلمت مجہولیت ایچندہ قالان قوم عربک تاریخ قدیمندن بحث ایتک، بالکلیہ فائدہ دن خالیسدر۔ زمان نبوتہ قدر عربستانک تاریخی، دائمی برجنک وجدالدن، نہب و غارتدن، اخذ ناردن، قبائلک تشکل واضح محلالندن عبارت برجدول و قوعاتدر۔ اشبو قبائلک

کانه سی نسل ابراهیمدن کلدکلرینی ادنا ایدر لر . فی الحقیقه  
لسان عرب ایله لسان عبرانی بیتده کی مناسبت ، عربلر ایله بنی  
اسرائیلک بر اصلدن نشأت ایتدکلرینی اثبات ایتکده و بو حال  
آنلرک جزیره ده شمالدن داخل اولدقلرینی کویسترمکده در .  
لکن اکلاشلدیغنه کوزده شمال قومنک بو وجهله جزیره دخو-  
لندن اول جهت جنوبیه سی یرلی برطام قبائل ایله منکون  
ایمش : بو قبائلر چوق وقت شمال اهلایسندن متفرق برحاله ده  
یشامش لر . « عرب » اسمی دخی جزیره نک سکنه اصلیه سنه  
ویریلن بر اسم اولدینی بیان قید و تذکار در . قبائل عربک  
تاریخ مفصلنه کیرشمکسزین احوال عمومیه لرینی خلاصه نظر دن  
کچیرمک ، موضوع بخشمره بالکلیه اجنبی اولیوب بالعکس مباحث  
آیه نک تفهیمی تسهیله بادی اولدیغندن بو بایده بوجه زیر  
بعض افاداتک تمهیدینه لزوم کورمشدر .

۶ . — عربلرک مبادیسی . ازمنه عتیقه یه طوغری امتداد  
ایدر . عربستان قطعه سی ، طوفانک عقبنده حضرت نوحک اوغلی  
« سام » اولادی طرفدن اسکان ایدلمش ایدی . بونلر مرور ایام ایله  
قبائل عدیده یه انقسام ایتدی لر . باشلیجه لر ی عاد و تمود اقوامیدر .  
اشبو اقوام قدیمه ، ایشلدکلری مظالم و تعدیاتک مجازاتی اوله رق  
محو اولوب کیتمش : یا خود عالمک انقلابات و تحولاتی آراسنده  
سائر اقوام ایله اختلاط ایدوب ناملری اونودلمشدر . بونلر  
حقنده دوران ایدن روایات ، اقل قلیل اولوب قرآن عظیم الشانک

بعض آیات جلیله سنده حالرینه زمرن و اشارت بیورلمشدر .  
 عربستانک شمیدیکی اهالیسی، سامک دردنجی بظنده کی  
 اوغلی ( قحطان ) سلاله سندن اولدیغی ادعا ایلمکده در . بونک  
 احنادی، جزیره نك جهات جنوبیه سنده کائن یمن، حضر موت  
 و مهران دن شمالاً سوریه یه و بصره کورفزینه؛ شرقاً عمان و  
 بحریندن اعتباراً وسطده نجد و غربده حجاز جهتلرینه و بحر  
 احمر سواحله قدر یایامش لر ایدی . اوغلارندن « یعرب »  
 ینده بر حکومت تشکیل ایتدی . آندن صکره بوقطعه یه  
 « جزیره العرب » تسمیه اولندیغی کبی عرب قومی دخی مملکتلر-  
 ینک اسمیه یاد ایلمشدر در . قحطانک دیگر اوغلی « جرهم »  
 دخی حجاز طرفلرنده بر حکومت تشکیل ایتدی؛ کندن صکره  
 سلاله سی چوقوقتلر سرکارده بولندیلر . ابراهیم علیه السلامک  
 جازیه سی هاجر ایله اوغلی اسماعیل، عربستان جهتنه کوندرلدیکی  
 وقت، اشبو جرهمیلر طرفندن حسن قبوله مظهر اولمشلر ایدی .  
 برمدت صکره اسماعیل علیه السلام، جرهم سلاله سندن « مضاض »  
 نامندکی رئیسک کریمه سی سیده وبعده رعاه بنت عمر و ایله  
 تزوج ایتدی . بوصورتله قوم عربیه اجنبی اولان بنی اسرائیل  
 قانی قارشیدی . حضرت اسماعیلک اون ایکی اولادی دنیایه  
 کندی . بونلر اول قطعنه نك اداره سنی انارینه آلدیلر و آنلردن  
 اون ایکی قبیله حصوله کلوب « قحطان » سلاله اصلیه سنی تحویل  
 ایتدیلر . بونلردن اک مشهوری نابت و قطورا ایله قیداردر .

توراتك تكوين المخلوقات كتابنده اون یدنجی بابتده.  
 دینلیورکه: « ابراهیم ، اللهه » همان اسماعیل حضور کده یشاسون»  
 دیدی . الله: - اسماعیل حقنده سنی دیکلیوب ایشه آنی برکته دم  
 و آنی میوه دار قیله رق غایتله چوغالده جغم و او اون ایکی امیر  
 تولید ایده جک بن دخی آنی بیوک برملت قیله جغم - دیدی .  
 تکوین المخلوقاتك یکر می بشنجی بابنده اشبو اون ایکی  
 امیرک حویله دن آشور یولنده مصر قازشوسنده واقع شوره قدر  
 ساکن اولدقاری کوسترلمشدر، که جزیره العربک برقسمندن  
 عبارتدر . آنلر حقنده در میان ایدیلن تعریفات بو کونکی  
 عربلرک احواله تماماً توافق ایدر . آنلر دخی، شیمدیکلر کبی  
 قسماً شهرلرده و حصارلرده اقامت ایدرلر، قسماً چادرلریله  
 بیابان بداوتده طولاشیرلر ایدی .

اسماعیلک اوغلارندن نابت ( نبایوت ) ایله قیدار، سورو -  
 لرینک کثرتی و قیونلرندن آنان ییغیلرک لطافتی ایله پک زیاده  
 کسب اشتهار ایتشلردر . نابتدن نباتای تولد ایتدی . قیدار  
 دخی نبی اکرم صلی الله علیه وسلم افندیمز حضرتلرینک جد  
 اعلاسی اولدی . زبورده علی طریق التجوز قیدار اسمی بالجمله  
 قوم عرب حقنده استعمال ایدیلهرک « بن ( مزهک ) ده اقامت  
 ایده یورم، قیدارک چادرلرنده اوتورییورم » دینلمشدر .  
 اکلاشلدیغنه کوره چولارده کشت و کذار ایله بن عربلر بو ایکی  
 ذاتدن تولد و تکثر ایتشلردر . ارمیا علیه السلام آنلر حقنده